






山陽陸氏族譜





山陽陸氏族譜卷之四

墓誌

樸菴陸公墓誌銘

吳承恩

往余造士太學淮郡陸生遙者與焉生文  
雅好修余所愛也今年嘉靖戊午生來試  
京師既下第將歸告余以葬父且告乞銘  
生之翁之歿於茲蓋十有餘年矣斯而葬



家多故也夫愛其子及其翁於翁亦亟聞之矣能無言諸翁諱瓚字宗器別號樸菴鄉人稱之曰陸樸翁先世鹽城洪武由鹽城聘至山陽有諱輔者居新城之東北郊樹藝農圃輔生子景茂景茂生子清清世其家業甚勤不數年生殖漸廣遂移居東仁里故東仁之有陸自清始清生子四長卽翁次日現曰瑄曰玘翁性坦夷多遠畧

少卽薄農圃不爲棄去市易市易裕矣復棄去爲麪戶淮之大賈也翁益弘焉而三弟者惟翁之爲式故財力益儲大抵翁之治生用能觀時洞情會物之變心計命中投無遺機故東仁之陸之大小自翁始翁旣造厥家拓法於微諸弟計將分異翁度其不能輯也聽焉出簿曆示之始終纖細一錢寸楮無不昭晰者弟大服後弟各高資



過翁數倍或尤翁失私計翁夷然不以介也翁雖號殷富其服勤履約蓋由素然平生起處必見星衣布帽羶沒其身不易食靡兼味處匪華屋內鮮侍婢出無隨童逡透衆人中遇者不知其爲東仁陸也至於給賦應官賑人之急治道路修橋梁則慨然赴之人於是知樸翁非苟約者而度真遠矣晚年多疾病廢臥一榻忽忽寐語皆

子孫良圖至嘉靖辛丑六月廿六日竟不起距生於天順癸未六月初六日得年七十九云配石氏先翁卒生一子經早逝側室金氏生一子卽太學遙娶葉氏女二孫男三慎履娶胡氏繼祝氏率履娶楊氏繼張氏素履娶唐氏曾孫男七至高聘周氏至厚聘周氏至順至明幼未聘慎生嘉節嘉穀嘉興幼未聘率生遙卜以後年庚申



葬翁於城東三里塘芝蔴墩去節孝先生之墓百步遙薄財厚學故自翁之逝貲減而譽增其諸子又皆森然有科第之望翁之遺澤不亦昌盛也哉

銘曰

惟有樸德

爰有樸福

是曰樸澤

石旣剖玉

麗彼川谷

宗輝陸公暨元

配曹孺人合葬墓誌

銘

潘

墳

河南巡撫

嘉靖乙未秋九月七日逸菴陸宗輝卒以丙申年冬十一月二十五日祔葬柳淮鄉祖塋旣十有八年辛亥冬十月四日配曹氏卒子驥等更卜地祖塋之東以明年壬子冬十一月二十四日吉遷父柩合葬從



吉兆也乃走告予且持所爲狀乞銘予昔  
官給舍歸省聞宗輝賢以長女許聘其子  
道未行而夭而宗輝與道益親愛予不忍  
絕道旣改婚朱氏亦卒予且衰廢而其妻  
若子及諸弟猶能推父兄前日之愛愛予  
然則銘宗輝之墓非予其誰按狀陸氏世  
爲淮之山陽人高祖乾曾祖司訓輔祖景  
茂相繼俱清白無餘財積善循理兢兢惟

恐逆天景茂與其內顧氏嘗教戒其子曰  
清汝知富貴在天轉移之機在我慎毋自  
暇逸清曰諾吾將自奮矣乃日操泉貨入  
市坐一廛學爲廉賈耻爲貪賈由是而生  
業日懋生四子曰瓚曰現卽宗輝曰瑄曰  
玘皆克肖乃父相與戮力發貯鬻財彙數  
萬金天之福善可知矣宗輝尤厚重質直  
其幹蠱勤其制用節終身不改於父之道



孝可稱也同居則穌異產則合而不虞他  
日之負我友可稱也故舊不遺侮奪不較  
赴人之急濟人之乏勤公家之事代貧民  
輸役其信義可稱也爲麴蘖家爲母鹽氏  
擅闔郡高資不喜交遊不御輿馬不驕不  
泰不僭不奢其善富可稱也此孔子之所  
謂善人非邪配曹氏亦故族女年十六來  
歸操井臼主中饋養舅姑相夫子蚤作夜

息克勤乃家生四子長卽道次路亦卒驥  
國子生蕙亦有志應詔輸粟里有鄉賢左  
都御史楊靖墓麥飢無主卽慷慨從倡義  
之舉建昭恤院奉祠非古仁人興滅繼絕  
之心乎宗輝之遺教可徵矣宗輝生成化  
辛卯七月四日享年六十五曹氏生壬辰  
四月三十日年八十令終壽考吁其不能  
偕老者命也女一適鄉人鄒孔學婦四道



路俱朱氏驥李氏蕙蔣氏孫男五胤丘氏  
衍何氏衢金氏徵聘杜氏衡金氏孫女二  
長適國子生張克勤次許聘朱愈

銘曰

天不遠兮惟心相通福不遠兮

惟善相從世德作求福祿來崇

逸菴有善被於厥躬孝友信義

孚帝之衷亦有淑德媿於梁鴻

二人同心以豫以豐天錫祚胤

食報無窮順天者吉逆天者凶

勒我銘辭庶可以風



鄉飲賓冲菴陸君墓誌銘

張璧 東閣大學士

太史公曰兩淮間為天下都會產多異人  
乃今得三賓陸君有足稱者狀曰君故商  
也諱瑋字宗遠號冲菴淮山陽里人侗儻  
爽俊少負奇氣好進取乃後抑業為商善  
乘時便家遂饒裕君樂施予嘗歲大饑且  
疫流亡日益眾君曰忍厚自豐乎悉出帑



積分賑之收其死而葬埋者數千戚黨族  
多困踣又曰忍厚自豐乎計指口量近遠  
酌婚且嫁者葬者費時時給養之尤勇於  
爲義凡里中橋梁路道及祠宇壞悉捐金  
爲之不少怯君早喪母父獨居君就養節  
宣咸竭心力逮寢疾視湯藥問寒煖旦夕  
不忍去左右比卒號痛哀毀并襄事中禮  
度兄瓚弟玘欲離籍自便君弗能止乃析

居君獨與現仍共籍財業至今無異志焉  
瓚現先君卒君撫其孤教育若已子輸粟  
爲太學生者六七人曰無令墮吾先業居  
嘗自嘆曰吾祖吾父吾弗獲養而吾祀事  
弗虔豈爲人後者識耶歲時率妻子具俎  
殺糝奉寢廟惟謹君行信於鄉聞於郡大  
夫大夫延爲鄉飲禮賓君三爲禮賓或曰  
君賓之三也故人稱爲三賓云嗚呼可謂



賢也已配何氏諱善靜嘗讀女範有淑行  
能佐君起家人亦稱曰足配君爲良配也  
君高大父乾母韋氏曾大父輔歲薦授山  
東邑教職母盧氏祖晟鄉飲三賓母顧氏  
父清母王氏子一曰田太學生娶梁氏女  
一適太學生謝良材孫三曰德曰律曰徑  
律太學生曾孫二曰嘉慶曰嘉兆生成化  
十年甲午卒於嘉靖二十三年甲辰享年  
七十有一田將以明年正月初二日與何  
孺人卜吉城東新壟之原共封樹焉是宜

銘曰

淮水湯湯 僻流遠疆 乃有伊人  
隱業於商 敦尚懿行 爲鄉善良  
遺厥後裔 益永而昌 庶徵史氏  
紀德無忘



陸氏族言卷四  
陸氏之先以敦樸起家而中發於文雅  
蓋郁郁云太學衢陸之雋也與余善衢父  
坦齋處士無子且體弱多病以衢蚤慧愛  
之異常嘗謂家人曰吾羸疾若此知奈何  
儻一旦不諱必以衢為後及病危乃徧告

午四 坦齋公暨元配朱孺人合葬墓誌銘

錢之選

余昔者忝刑曹理漕刑淮上因識淮之陸  
氏陸氏之先以敦樸起家而中發於文雅  
蓋郁郁云太學衢陸之雋也與余善衢父  
坦齋處士無子且體弱多病以衢蚤慧愛  
之異常嘗謂家人曰吾羸疾若此知奈何  
儻一旦不諱必以衢為後及病危乃徧告



宗戚告於廟而立之坦齋卒九年其配朱孺人卒孺人卒之歲爲嘉靖己未年月日嗣子衢將啟坦齋之窆而合焉馳書來告狀乞銘余惻然感其哀情因爲之叙述曰處士諱路字允平坦齋其別號也先世鹽城洪武由鹽城聘至淮高祖諱輔曾祖諱晟祖諱清父諱現皆奕世崇德母曹氏生子四人坦齋其仲子也坦齋之少也志爲

儒父以習讀爲勞命之賈其賈也重然諾持公平廉取而遠觀是故心逸而功倍尋常無別嗜好獨愛泉石耽圖書交游海內勝流談笑終日方陸氏殷盛貨貨雄淮中遠近望之坦齋顧儉素自將無異常人然者又最重義遇人有急渴赴之在兄弟間尤力性篤孝事父母曲盡朝夕鉅細惟志之承至於起居扶持藥物衣襦無不躬親



者父歿母寡居所以娛悅其心者更無不  
至每歲時節序必偕兄弟子姓拜父墓傷  
悼若初喪焉朱孺人家女父曰公母  
曰氏幼善女則歸坦齋益修坦齋賈四  
方孺人內綰家政勞苦蚤夜奉順舅姑輯  
上下和族姻慈飭婢僕雍雍然夫亡永矢  
厥志其於衢也蓋心命相依焉訓勵規圖  
暗與道合每與衢言必述坦齋臨沒之語

以爲戒泣曰汝父托汝於我我不敢忘也  
汝其念諸故衢好文樂善不墜家聲者母  
之教也坦齋生於弘治甲子年三月初四  
日以嘉靖辛亥年八月 日卒得年四  
十八歲孺人生於弘治庚申年 月  
日以嘉靖己未年 月 日卒得年六  
十嗣子卽衢以弟子員游太學娶金氏孫  
男嘉善聘太學生 女鳴呼夫垂統而



婦終之其繼陸氏之盛也豈徒然哉

銘曰

擇善行權未豫於生前世祚以綿

坦齋之賢主式承夫意教愛周備

造爾令器孺人之義一德相將

於昭不忘世短心長同歸允臧

東塘七里言從祖禰不慶澤瀾瀾

來裔雲起

叙寰公墓誌銘

夏日瑚 翰林院

予去年謬以第三人備員清禁獻納之暇

念故國友人惟叙寰陸公最密每誦屋梁

落月情不能已已居無何凶問忽至為位

於寢門外哭之踰秋及冬公二兄文學際

明公請曰弟將葬矣請誌其墓者予以公

與余為膠漆且辱在史氏其何辭因按狀



而爲之誌陸公行四諱士倫叙寰其號惇甫其字淮山陽人也系出宋丞相秀夫丞相在崖山一子好弋獵不稱丞相意遣歸居淮之鹽城開瓜甍之傳爲公始祖元興耻事二姓遂以耕讀教子孫我太祖御宇占籍山陽數傳至太學生新川公公之考也新川公抱魁傑才名噪成均未及大用旣生公有異徵新川公摩頂嘆曰是兒風骨不凡陸氏之興其在茲乎公弱冠通百家言爲文踔厲自喜耻寄人籬下鄉族重期之當神廟末清流憤激漸有南北部之分公以攻苦致疾常伏牀褥間因慨然曰申屠蟠超然評論實獲我心吾將括囊以游方之外矣是時公考新川公已卽世奉母杜氏母知公意謂曰能如是乎與汝偕隱爲人子者不必以祿養也公乃謝舉子



業混跡廛市公居市無市心言必道義行  
必忠信鄉里有曲直爭取決焉蓋幾幾乎  
陳太丘郭有道也公性純孝齠齡時冬溫  
夏清食上必在寒煖視無形聽無聲婉容  
愉色粗傲不見於面昆季五人閭門內外  
皆嘖嘖稱公無間太學鳳野郭公負知人  
雅鑒有女賢不輕字一見公卽欣然許每  
爲識者所重公與昆季相友愛長兄楚穎

公最先卒五弟楚白公後公一月卒當其  
析產時公一無所爭取日寄情麴蘖身自  
監製南北貿易家日隆隆起卽有挾長藉  
口爭財者橫逆屢加公情恕理遣而已晚  
年好遊凡名山水必探幽奧令子殂落悲  
傷抑鬱游興稍減坐幽室日勸勉孫求可  
讀書將以數世所未發者大發於求可之  
身前年予公車北上公携孫送予已輒然



見頭角矣予既登第致書於子猶願走京  
華覽皇居壯麗以終遊與子亦冀從旅邸  
望顏色未幾訃聞矣嗚呼痛哉公生於萬  
曆乙亥年二月初一日亥時卒於崇禎五  
年六月三十日亥時享年五十有八歲娶  
郭氏太學生鳳野郭公女子一諱維師早  
卒承重孝孫求可次孫再可又次曾可俱  
幼業儒女一殤許字孝廉任招遠縣潘公

清暘子葬山陽七里塘之新阡

銘曰

幽人履道

榮利何求

珠藏玉韞

川澤悠悠

市廛瀟灑

松菊優游

知幾削迹

谷口風流

儀刑邦國

月旦林丘

清風五岳

浩氣千秋

哲人凋謝

大雅行休

暮雲隕涕

春樹生愁

竊比作誄

照耀松楸



春樹空想  
 蘇州於荷  
 張跋公林  
 昔人賦滿  
 大郡許村  
 蘇靈則  
 日且林立  
 常風正岳  
 常康于海  
 吹幾階  
 谷口風流  
 蘇氏飛  
 川擊  
 市墨  
 蘇氏  
 蘇氏  
 蘇氏

叙寰公元配郭孺人墓誌銘

史大成  
翰林院修撰

陸太夫人郭太君子同年陸子咸一之王  
 母也咸一工文章詩詞古文絕今古經綸  
 碩懋為當代名臣嘗考其先蓋系出鹽城  
 宋丞相陸公秀夫丞相一子諱繇喜游畋  
 被遣回籍故赴海時獨不及難乃天巧存  
 忠義之祀也凡為之裔者允宜克念丞相



丞相之大節在厓山丞相之學問在太學  
厓山大學卽爲男子亦難楷模太夫人奉  
之兢兢焉太夫人以名家女幼親文翰解  
詩禮大義十六歸陸氏陸氏自元迄明遠  
不及紀成弘間以貴雄淮楚曾太翁新川  
公馳聲太學太翁叙寰公業擅素封俱未  
享遐齡令嗣三錫公茂才蚤逝懷抱未展  
王母暨母二寡同居而煢煢弱息成一僅

十齡行一七齡時一胎五月鞠育之撫綏  
之猶恐未有成立况風雨飄搖毀我家室  
構訟者復有之此時爲太夫人亦良難耳  
稍緩惻焉藐諸孤於此而廢乃機杼伴宵  
讀漏數下其相和聲猶未歇也以致咸一  
成進士若仲若季得列膠庠雖淵源家學  
然訓導滋苦焉夫承家保國每以委頓不  
前遂至投之中幘抑知中幘中固有毅而



奮振而興之若此使易以簪纓錫之珪爵  
當國步之多艱際傾危之莫挽成仁取義  
直指顧間事又何厓山之節大學之書爲  
不可楷模乎陸門世篤忠貞咸一出家乘  
見示自五代迄唐宋枝分派別如陸公贄  
九齡九淵諸公皆其華胄畫丞相像者六  
宋名賢如蘇洵文天祥真德秀王十朋諸  
公皆有題詠筆精墨妙對之肅然起敬元  
以後簪冕稍踈豈子若孫能體厓山以仕  
元爲諱沿至明遂中落耶聞黃淮二水初  
發源非不浩瀚伏脉潛行地中者千百里  
乃始奔騰澎湃今咸一文章經濟爲時弁  
冕繼起者蟬聯絡繹其以元明間爲伏脉  
歟太夫人孝慈勤儉寬和謙睦懿行多端  
難以殫述壽七十有六飄然而逝仁者必  
壽天之報施渥矣太夫人生於萬曆丁丑



年五月十三日亥時卒於順治壬辰年四月二十六日卯時享壽七十有六生子一諱維師字天寵號三錫攻舉子業年三十一卒男婦姜氏苦節待旌生女一殤許孝廉任山東招遠縣潘公子孫男長求可乙未進士婦郭氏曾孫男三志謹志寬志默孫女一適壬辰進士周公諱龍甲子恪次孫再可府庠生婦柳氏曾孫男二志仁志遠曾孫女四季孫曾可縣庠生婦孫氏曾孫男一志超曾孫女一孫女一卒適徐允升今葬於夾城之新阡余忝列年末烏可無銘

銘曰

含弘光大兮德乃昌  
厓山莒婦兮史重光  
以媯補天兮佳城方  
後千百世魄兆康  
史氏作銘代樂章



叙寰公元配郭孺人改葬墓誌銘

丘象升翰林院侍講

孺人郭姓太學生鳳野公女淮山陽鉅族

與陸氏通婚姻孺人年十六適陸公叙寰

生子維師博學多才好任俠年三十一卒

有孫三長日求可乙未進士官福建提學

卽世所號密菴先生者也陸之學暢於密

菴而家昌於孺人孺人佐叙寰公事舅姑



處仲叔妯娌曲盡壺德鹽米井臼紉緝無  
不躬親密菴之狀孺人也泪泫泫下予讀  
之不能終卷蓋於婦克孝於母克慈於王  
母克兼慈訓孺人嘗撫密菴曰陸其興乎  
密菴官通顯又有丈夫子孺人皆及見是  
其承先啟後有自按孺人葬與改葬密菴  
諄諄未遂者密菴歿曾孫國博志謹善繼  
其志陸氏之世世象賢於是可書初孺人

窀穸地乙龍於穴未善密菴謀改葬會歿  
不果志謹延形家者流周爰諮度而江右  
湯公惕菴熊君以智移坎上數步後又經  
鄔山人茂修改卜石塘河北吉兆孺人享  
年七十有六子一孫三長孫求可  
誥授奉政大夫提督福建學政按察司僉事候  
補叅議卒長孫婦

誥封宜人郭氏卽孺人族也曾孫男三志謹志



寬志默重孫觀兆麒嵩年次孫再可明經  
選卽墨二尹卒娶柳氏重孫男二志仁志  
遠季孫曾可庠生卒娶孫氏重孫男志  
超志謹能承父志改葬石塘河北朱珍卿  
地計六畝五分癸山丁向兼丙子丙午分  
金先葬在順治丙申三月十八日後改葬  
在康熙辛酉十二月初六日酉時今改葬  
在康熙丁卯年正月十八日寅時謹捧其  
原狀來請銘升與陸以年譜適  
假還誼不可辭爲之銘

銘曰

葬而更卜 兆未墨食 再卜襲吉  
孫謀是力 厥孫慎之 曾孫成之  
宜爾孝思 克昌克熾







兒嬉游必正襟危坐言笑皆不妄少長舉  
動合禮法未嘗出入坊肆就外傅一目數  
行踰年通經史大義揮毫落紙雲烟奇變  
不泥古人而自與古合時輩推讓之君器  
識遠大不傷浮薄性骨鯁善持議論述古  
今成敗得失侃侃有斷決聞其說者懦者  
以奮頑者以醒奄人煬竈黨禍滋興名賢  
喪氣君居恒蒿目抵掌以國家爲憂聞者  
訝之然實賈長沙慟哭流涕之意也君事  
叙寰公及母郭孺人先意承志無幾微忤  
疾痛疴癢必躬扶持呵護之雖中夕猶四  
五起未嘗委諸臧獲無昆弟視從兄弟如  
同父君被服寒儉惡輕肥侈靡好施予不  
問多寡鄉有負租賦抵縣法者初未相識  
揮金脫其罪友人貧弗能婚貸於君奉券  
君艷然曰吾豈鄉里守財者流耶念子貧



而貸胡券爲立焚之豪俠之名聞閭里君  
性和凡族黨姻友與君居處如飲醇醪然  
和而實介不少苟且故深相知者鮮維予  
頗密凡絃誦讌會必偕今春修禊事少長  
咸集相對數斗予與君酒酣耳熱登鉢池  
涉湖心歌浮雲蔽白日之句豪放慷慨旁  
若無人已而夕陽在山村雞鬪爭予枕藉  
於落花芳草間君乃戲呼予曰岳生岳生

天下事尙可爲胡乃玉山頽然將欲老作  
華胥國主人耶予驚起酒醒而別未幾而  
君病矣君念叙寰公母孺人在堂恐以已  
疾爲憂恒自諱不醫藥故至於劇易箒之  
際二親執手嗚咽不勝君力疾起再拜自  
陳不孝狀願二人無哀傷涕泣顧視諸孤  
點首若有以自慰者踰時而卒大抵君負  
才骯髒憂能傷人故至此也君才旣敏又



承叙寰公及新川公家學於書無不窺陰  
陽律曆兵法悉貫穿洞達著述頗富多爲  
友人携去篋中藏者惟醫方至要數卷皆  
手自鈔訂寄托甚大嘗曰儒者讀書萬卷  
不進而爲良宰相當卽退而爲良醫今賚  
志以歿其默啟後人可知也已君生於萬  
曆丙申年十二月初五日丑時卒於天啓  
丙寅年五月初七日酉時得年三十有一  
娶姜氏名門女孤子長求可十歲次再可  
七歲又次曾可君卒後數月始生女一幼  
未許字君旣卒叙寰哀不已泣謂子曰兒  
之死命已夫今吾將謀七里塘之原而葬  
焉惟子有以不朽之庶塞子悲因相與追  
其生平并及終寢時事對泣失聲以叙寰  
公命拭淚而誌之

銘曰



祥麟威鳳 盛世開先 麟泣鳳哀

公云胡其然 嗟哉吾友 不得長年

其文章禮樂 腹笥便便 危明憂盛

魏關心懸 醫方肘後 良相同權

生平失意 地下誰憐 西河老眼

淚下涓涓 北邙松栢 慘淡雲烟

啟佑後人 以永其傳

誥贈奉政大夫提督福建學政按察

司僉事三錫公元配

誥封太宜人姜太君墓誌銘

賜進士出身通奉大夫戶部左侍郎

加二品服俸前內閣學士兼禮部

侍郎經筵講官日講起居注官纂

修聖訓副總裁甲辰會試同考姑

蘇門年眷姪宋德宜撰文



賜進士出身通奉大夫巡撫浙江等處地方工部左侍郎兼都察院右副都御史加一級前翰林院學士戶部左侍郎經筵講官纂修實錄副總裁庚戌會試主考高平門年姪田逢吉書丹

賜進士出身翰林院編修癸丑會試同考溫陵門下晚生李光地篆蓋

淮郡山陽陸贈君奉政公棄世後太宜人姜太君苦節撫孤五十年如一日今一旦棄諸孤逝諸孤居廬三月毀瘠盡哀術者言是年干支與域兆合踰此三年不吉長公備位屏藩南北東西惟天子使不得不早謀窀穸於是從苦塊昏迷中飲血徒跣率諸子姓治一切塗車芻靈卜日安葬禮也德宜忝與長君求可鄉會同



門知陸氏家世最悉景太宜人徽音淑德  
亦最深也頃護喪者素車白馬一介將命  
詣京師請余銘余雖不敏爲門年家子且  
備員史館義不敢辭按狀太宜人姓姜氏  
淮陰望族也文經武緯代有聞人篤生太  
宜人荻提知孝稍長知敬通書史大義婉  
婉溫良動有禮法織紉組繡之能其餘技  
也太宜人之尊人鍾愛之期必得一快壻

足稱太宜人者考諸月旦始得  
誥贈奉政大夫陸公三錫考世系出宋丞相秀  
夫代衍至奉政公逸才絕倫識者有聳壑  
昂霄之望所與居盡名宿太宜人之尊人  
心許焉于歸之唱隨靜好姑疾幾危太宜  
人籲天求代不但瘁厥身以調湯藥已也  
姑獲就痊至孝格神里閨咸頌之奉政公  
性高簡好讀書廣交游不事生產太宜人



綜家政日用甘旨弔慶賓祭無少缺失姻  
族間稱其能奉政公奇於數抑鬱早卒堂  
上二人皤然白鬢長君求可次君再可尙  
未成童季君曾可胎僅五月太宜人悲號  
辟踊幾絕笑笑孤嫠健持門戶鮮脆滌滄  
備供高堂顧復訓課大振洵有其姜孟母  
風舅姑相繼殂落太宜人致哀盡禮必誠  
必信出服飾佐營葬之役篝燈夜織引諸

子於側呶唔申旦乃止又爲之慎選良師  
友三君以是咸成立長公求可登戊子賢  
書成乙未進士初蒞裕州太宜人命之曰  
州地離兵革未久荒殘寥落王事靡盬汝  
其勤撫字吾有汝兩弟供菽水足矣毋拘  
迎養以分汝勞也長公體太宜人意單車  
赴裕拊循而噢咻之由是晉刑曹迎太宜  
人祿養京邸諄諄敬恤相長公多所平反



太宜人輒色喜二年

特簡視學八閩太宜人憚遠涉長公瀕行太宜人曰閩地人文淵藪簡書可畏毋以不公不明上負

聖天子下負汝所學長公至閩正文體端士習所鑒拔多名彥諸如翰林李子光地唐子朝羹林子仲達陳子夢雷癸卯解元李子達可丙午解元蔡子奎己酉解元何子龍

文壬子解元林子銓皆所錄首卷人乃服長公能得士實奉太宜人之教也次君再可以明經舉於

朝授州同知改選山東卽墨縣二尹太宜人勸以勤職業爲保障毋爲繭絲一如長公治裕而卽墨以安三君曾可恂恂儒雅好學能文章太宜人猶朝夕進督之季君書諸紳太宜人善啟廸老而靡倦訓諸孫曾孫



讀書力行動由槩畫訓女孫女曾孫女皆  
以德言容功敬戒無違太宜人負性仁厚  
凡族黨戚里有婚嫁不時祭葬不備必周  
濟之使得所生平無疾言厲色遇臧獲以  
恩晚年善珍攝含飴弄孫一卮自娛長公  
依戀膝下當奉政公之初歿也太宜人年  
僅三十可謂遺艱投大矣太宜人從容拮  
据卒使功名科第赫赫於時五十年而安  
富尊榮邀寵光者二十年然則太宜人德  
以節全誠非易及而天之報施亦渥矣太  
宜人生於明萬曆乙未年八月二十四日  
辰時卒於

皇清康熙十二年癸丑九月二十三日子時享  
年七十有九兩遇

覃恩誥封太宜人爲

皇清誥贈奉政大夫提督福建學政按察司僉



皇朝事陸公三錫元配生男三長求可中順治  
單恩丙戌副榜戊子科經魁乙未成進士丙申  
任河南南陽府裕州知州擢刑部浙江司  
員外郎差福建恤刑陞刑部浙江司郎中  
陞福建提督學政按察司僉事考核稱職  
候陞布政司參議娶郭氏郭公諱珍女縣  
庠生郭公諱周猷姊封宜人次再可明經  
考授州同知改選山東卽墨二尹卒娶柳

氏柳公諱開先女季曾可縣庠生娶孫氏  
縣庠生孫公諱枝蕃女縣庠生孫公諱起  
臯姊女一適徐端儀卒孫五人志謹府學  
歲貢生娶閻氏鴻臚寺鄉飲大賓閻公寰  
振孫女前甲辰進士寧前參議祀名宦鄉  
賢閻公躡礎姪孫女戊戌進士國子監助  
教閻公諱若琛辛丑進士旌德知縣閻公  
諱洞妹志寬附例太學生娶趙氏明經趙



公諱特簡女志默府庠廩生娶劉氏甲辰  
進士內閣中書舍人劉公諱謙吉女俱求  
可出志仁太學生娶戴氏四川下川東道  
按察司僉事戴公諱時選女志遠聘黃氏  
附例太學生黃公諱嗣琬女俱再可出孫  
女十一人一適太學生周恪壬辰進士山  
東提督學政按察司僉事考核內陞周公  
諱龍甲子一字李師邕辛丑進士內閣中

書舍人李公諱時震子俱求可出一適縣  
庠生劉輝縣庠生劉公諱行子一適鹽城  
縣庠生張樹臯戊戌進士張公諱樹屏弟  
一適閻若璵鴻臚寺鄉飲大賓閻公寰振  
孫前甲辰進士寧前參議祀名宦鄉賢閻  
公躡礎姪孫戊戌進士國子監助教閻公  
諱若琛辛丑進士旌德知縣閻公諱泐弟  
一適安東縣庠生王頊辛卯舉人山東禹



城知縣王公諱表子俱再可出一適嵇昂  
丙子舉人杭州府知府嵇公諱宗孟姪一  
適丙午科武孝廉周允恭一字山東金州  
衛廩生程先謨濟寧參政岳公諱登科甥  
一未字一字孫振縣庠生孫公諱枝蕃孫  
縣庠生孫公諱起臯子俱曾可出曾孫三  
人一振贄志仁出一觀志謹出一兆麒志  
寬出俱幼曾孫女五人一志仁出一志謹

出三志寬出一字舒徐郡庠廩生舒公諱  
起鳳子今以康熙十二年癸丑十二月念  
五日葬於城東七里塘之新阡嗚呼使當  
日奉政公克永其年與太宜人偕老子孫  
簪纓侍養不過貴家命婦已耳縱考終正  
命亦烏能如今日清風峻節可法可傳生  
有餘榮而死有餘哀也耶他日彤管流芳  
斷以太宜人爲巨擘而又烏可無銘也



銘曰八為可學而又息西無

淑哉宜人下地道無疆維天不惠

命早稱未亡今當年三十曾撒環洗妝

管下撫諸孤上奉高堂日伯仲鵲起

日廊廟輝煌不徽音遐邇日齊之姜

幾臻大耋皎日秋霜藁砧殞喪

奇才蒙厄之死靡他我心匪石

副笄六珈鳳銜玉冊樂此桑榆

逍遙閒適白髮全歸黃泉以懌

潛德既彰清節無斁克開厥後

琳琅圭璧順時卜兆永就窀穸

淮水泱泱淮山奕奕於萬斯年

佳城孔碩



公海濱李以  
公海濱李以  
公海濱李以

公海濱李以  
公海濱李以  
公海濱李以

高貴 誥授奉政大夫提督福建學政按察

十世 司僉事候補布政使司參議密菴

對入自公墓誌銘 蕭蕭 蕭蕭 蕭蕭

鮮 賜進士出身資政大夫兵部尚書加

休忠貞 四級經筵講官長洲門年眷弟宋

公翰末 德宜撰文 密發其 密發其 密發其

賜進士出身通議大夫內閣學士兼

禮部侍郎溫陵門人李光地書丹



賜進士出身中憲大夫太常寺少卿

同里年姻弟楊名耀篆蓋

公諱求可字咸一密菴其號也系出宋丞相忠貞公世居鹽瀆世祖叔西公以賢能推擇督築大河衛城遷於淮遂爲山陽人陸氏自晉以來有譜譜淮族自西公始傳十世而至三錫公公之贈君也陸氏世以高貲聞以儒術起家者爲滋陽教諭時貴

公有以推財好施聞者廷秀公冲菴公也有以行業著聞者璧豐公憶豐公也有以好善通俠聞者新川公叙寰公也叙寰公傳三錫公公嗣三錫公生十歲而孤十九補弟子員試輒高等己卯餼於庠中丙戌副榜戊子魁戴記乙未成進士與余同出大興張公韓城高公兩司馬門丙申公筮仕裕州守裕乃天下綰轂地也疲且劇是



時方用兵州適當川湖滇黔衝度師輓芻  
無虛日需驛騎動數十百前守以乏軍興  
罷者數人人爲公恐公慨然日招流移撫  
溝瘠正盡心時也於是徵車千餘輛而民  
不擾銷積鹽一千九百而民不擾墾田二  
萬頃而民不擾歲大穰裕得復爲州任裕  
三年守之能聞天下矣以最入爲尙書刑  
部郎尙書者今太傅純一杜公也名爲知

人一見稱奇才決大獄必詢公太傅嘗從  
容語居官要公曰忙時莫忙閒時莫閒太  
傅大賞一時以爲名言嘗推重纍數十及  
子衿以抗糧當禡者數百人皆比例分別  
得無坐壬寅部考一等差督學八閩而公  
之學始大暢於造士矣閩才最盛公殫精  
較閱不失一士所拔盡英絕每第卷必手  
自填注案定必版告於天至今學士李公



光地果以風節見稱其拔士多冠鄉會聞  
人以爲精誠之至云始公守裕時士皆竄  
荆榛者十年公鳩集教誨之爲督學時所  
至必新聖廟飾諸鄉賢祠宇賑貧士無算  
行部時遭沿海遷民流離惻然首倡蠲賑  
不以非職所得爲辭部與紀錄一次前後  
視學凡六年蓋異數也丁未報

命部考公明稱職以布政司叅議陞任需次回

里癸丑姜太宜人病公亦患脾親嘗湯藥  
過瘁旣而姜太宜人逝哀毀柴立比大事

竣而病不支矣丁巳力疾候補至邸一載  
病復作抵舍而劇遂不起嗟乎公學宗濂  
維關閩蔚然爲士子師繇少有異稟篤孝  
友天才殊絕長而益以學力自諸生時已  
爲令君畫帑馬策大有裨淮人其後敷歷  
仕途一如駕輕就熟文章本經術三十年



海內傳誦公仲弟少尹行宜季弟庠生時  
宜少從公學亦皆行文有法先後成名大  
都公才無所不宜天下所共睹共信者惜  
乎位之不盡其才年又不盡其位爲公惜  
爲

國家惜也然語其所至亦可謂道全德備矣按  
公生於明萬曆丁巳五月初四日卯時卒  
於

皇清康熙己未七月初三日戌時享年六十有  
三順治十四年恭遇

覃恩誥授奉直大夫河南南陽府裕州知州康  
熙六年恭遇

覃恩誥授奉政大夫福建提督學政按察司僉  
事元配

誥封宜人郭氏郭公諱珍女庠生諱周猷公姊  
子三長志謹歲貢候選國子監學正娶閭



氏閻公諱貞元女次志寬附例太學生娶  
趙氏貢生趙公諱特簡女次志默歲貢考  
授教諭娶劉氏甲辰進士原任內閣中書  
科舍人加一級候補五部主政劉公諱謙  
吉女女二一適壬辰進士山東提督學政  
按察司僉事內陞京堂周公諱龍甲子太  
學生恪蚤卒一字辛丑進士內閣中書科  
舍人李公諱時震子師邕孫三觀聘乙未

進士太常寺少卿楊公諱名耀孫女候選  
國子監典籍楊公諱雯女謹出兆騏聘甲  
辰進士內閣中書科舍人馬公諱文璧孫  
女附例太學生馬公諱翼發女寬出嵩年  
聘辛丑進士湖廣道監察御史前巡按山  
西督理河東鹽政河南道試監察御史李  
公諱時謙孫女太學生李公諱師沆女默  
出孫女七一字中憲大夫浙江杭州府知



府徵辟嵇公諱宗孟孫候補國子監學正  
嵇公諱亮子霖蘇一幼未字謹出一字庠  
生閻公諱修齡孫徵辟太學生閻公諱若  
璩子訓慤一字郡庠廩生馬公諱周邕子  
瀛陟一字郡庠廩生舒公諱起鳳子歲貢  
訓導徐寬出二幼未字默出今卜吉於康  
熙庚申十二月十八日申時葬公於七里  
塘

誥封姜太宜人側癸山丁向有墓石焉余與  
公生同省師同門交同志嗣君以使來徵  
銘非余其孰知公詳者乃雪涕而次之系  
以銘

銘曰

洋洋淮流 三洲之濱 千里真源  
湊彼淮津 實鍾全才 爲時儒珍  
一試瘠土 奏刀如神 大器規矩



方圓惟甄 太樸斲彫 珪璧爰陳

豈惟其才 其德誰倫 哀矜惟恤

宜岸如春 慈惠之師 世稱大仁

晚以鴻文 作範七閩 斗懸山立

黼黻炳麟 起衰八代 式我大醇

惜用不究 志未大伸 人亦有言

不於其身 公侯必復 是在後人

觀此貞石 百世維新

碑

陸氏墓碑

予姓陸氏字景茂娶顧氏生前篤實處事

安詳不貪不妒愛敬恒常盈門餘慶幸有

流芳一日默坐語清子曰人生百歲七十

鮮矣况今踰矩死何恨焉今城東關家橋

地界高阜草木胚胎可以容予之儀骸與

汝母合葬焉穴定申山寅向又兼庚甲坑



深八尺土靠外存勒石垂後自立石後不  
可更予之遺言改已定之方向言畢長逝  
鄉人聞斯嘆且泣曰哀哉鉅公壽考令終  
子孝孫賢德潤家豐正宜享福忽漫歸空  
不聞聲譽莫覩儀容幽明永隔人世難逢

峇

弘治歲次戊申壬戌月吉旦

孝子清海泣血述立

康熙歲次辛酉乙未月吉旦十代孫志謹  
等重勒石



參議密菴陸公墓碑  
吳興沈大辛酉丁未良吉且十外新志

參議密菴陸公墓碑

姚江黃宗羲

公諱求可字咸一別號密菴姓陸氏宋丞相忠貞之裔世居鹽瀆明初有以賢能推擇築大河衛城遷於淮遂為山陽人祖叙寰父三錫公為諸生已有當世才具為上官畫養馬之策民以不病登順治乙未進士第授裕州知州入為刑部員外陞福建



提學僉事轉布政司參議未上而卒公爲人豈弟雅以濟物爲務當其在裕狗地之師相望絳標寸紙一日數至徵材切里俄頃十催公應以暇整民不告勞赭陽一驛舊設馬六十後減至三十一站銀六千七百餘減至二千一百餘事增於前十倍而費減十之八難爲意計公貸軍府子錢市馬六十劣充急發舊三萬戶戶三男子則十萬丁也故派鹽二千九百引其後丁止一千九百鹽引尙存一千六百是一丁食一引矣公請於漕使者減至一千引民力稍甦舊額墾田一萬九千三百餘頃近墾五百餘頃而已其征賦皆取盈於五百餘頃之內逃亡日甚公設法誘墾污萊之田二而當一礪瘠之田三而當一自此民勸於農鋒鏑之餘絃誦久息公新其學校躬



帥藝文化屠羊馭馬以爲秀士邑無文獻  
以禮樂爲殘賊比文章於鄭衛公考其山  
川人物撮殘糾謬秉筆文閨裕始有志凡  
公之所以籌裕者如庭內灑掃無不周歛  
其在司寇寃訟洗遂痠弊昭蘇每退食遲  
遲母夫人詰之公曰今慮囚者多以刺深  
免咎故煩文滯劾證逮遐廣苟循成案幾  
人當斬幾人當絞吾所以不敢也當其衡

士剪拉榛楛斟酌爾雅瓢笠之門俱起講  
堂而南宮之夜光多經公所採拾其入輿  
人之誦者鄉賢之祀鮪不給祝則優劣枯  
骨香燈爲之肅然有司賤士纖介之惡便  
遭裁辱則請之督撫未離士籍不得妄施  
荆革其所至及物如此臨官之外破產而  
字死友之孤開門而延故人之殯如田孝  
廉姜符玉翁陵周文學枚數之而不勝蓋



天性然也從來訾吏治者不過曰傳舍其  
官夫傳舍者暮至朝去總使飼馬於軒宿  
隼於堂其破碎猶可支以顧今之所謂傳  
舍者非昔之所謂傳舍也以傳舍爲已物  
采桷構櫨侏儒椳闌店楔必欲發之而去  
以大宮之椽歸爲盧門之椽寧復有傳舍  
乎南陽久已無裕因公重立亦如叔孫媾  
所館雖一日必葺其牆屋去之如始至者

也傳舍亦何幸哉生於萬曆丁巳五月初  
四日卒於康熙己未七月初三日娶郭氏  
誥封宜人子三志謹國子監學正志寬太  
學生志默歲貢生女二周恪李師邕其壻  
也孫男六兆騏觀嵩年鶴年餘皆幼孫女  
七志謹千里求銘銘曰

史傳循吏貴乎寧一瘡痍未起賊梳兵櫛  
逃屋荒田租吏絡繹吁嗟密菴仁心爲質



岩疆風雨立彼家室入總刑名破冢而出  
出考藝文廟堂琴瑟華表石言表裏史帙

山陽陸氏族譜卷之四

山陽陸氏族譜卷之五

傳

鄉飲賓冲菴公傳

宋景

工部尚書

陸翁名瑋字宗遠淮之山陽人也幼粹敏  
不羣頗究儒業未克有就隱居自樂恒以  
濟物為志冲然無外慕一切趨趨囁嚅之  
習舉不屑之因自命曰冲菴縉紳輩咸許



可之以爲信然嘉靖癸未歲大饑流民相踵翁爲粥於路俟餓者而食之所全活甚衆雅好古方書或以病告輒製藥療之無弗愈者值荒菑之餘遺骸枕藉募人收葬表爲義阡郡城失火延燒數百家問其貧者各賑以米凡親友不能婚者出資助之鄉人有罪力莫贖者代爲之贖其敦義喜施未嘗少怯亦其天性然也邑當水陸之

交適橋圯塗濘莫適與謀羣白之翁卽麾金爲諸人劊不數日而就仍發義井以利鄉閭先賢祠宇聞有敝壞應葺者亟往經營尤所不較暇則尋壑經丘與魚鳥共適遇釣弋爲業者畀以錢縱之戒曰汝勿戕生爲也邑侯高其義值鄉飲每延致之賓筵以風勵後進訓子孫以嗣守耕讀母爲他習享壽七十有一厥配何內行相埒其



卒之歲壽與翁同人咸異之嗚呼若冲菴者使其乘時躋位克究夙志其所弘濟不啻若是顧今之都要顯者類能體翁之志斯民實受其福乃不獲時見而翁卒以是成名余故重有感焉遂叙翁之行而傳之

太學璧豐公傳

閩南謝

彬

南京戶部郎中

太學生陸田字允登號璧豐淮之山陽人於是璧豐卒及期矣其仲子太學生律痛父之在世有隱德而歿焉遂無聞也則乃裹衰而襲袍遍以號於留都士大夫之門曰嗟乎孰能爲吾父言者仁人也已則以友人馮少洲爲介持刺謁吾門而請焉予



舊識允登於維揚之使館頗能言其人行  
事大率朴茂而純明勤儉而好義不任非  
其力不覬非其分夫是以治生而裕處父  
母師友而宜雖迹溷於人而志有以自別  
澤未及於物而道足以潤身孔子所稱有  
德君子者耶先是允登父瑄爲淮右大賈  
以資碓里中允登少不好弄稍長卽委已  
於學旣困不得意則遂奮然曰力田不如  
逢年刺繡文不如倚市門吾命不逢時吾  
有吾父之賈在吾何求哉於是出則任其  
父賈坐市區而與儔人分什一之利入則  
奉其二親承顏色而順志意暇則課其子  
以詩書已而賈益進家用益饒其父憂不  
可使吾子有多財之累會有詔令民得入  
粟補國學弟子員允登知其父志應詔而  
出補爲南國學弟子時司成鄒東廓倡道



東南日與其徒講說聖賢心學允登婆娑  
津灌其間以得聞所未聞大有所啓益視  
嚮什一之利不啻過之在太學好賑人之  
急同舍生有疾患恤之如不及貧不能自  
存者量捐資以予之不責其償或難之曰  
吾志也後歷銓曹事未竣一日忽心動遽  
告歸衆不能止至家其父寢疾璧豐侍疾  
衣不解帶湯藥必親嘗及卒哀毀過禮喪  
母何亦如之旣免喪殊無意起卒業親知  
者疆起之至再三則應之曰而信以吾之  
志爲有所利於人主之爵祿耶吾得庶幾  
慰吾親而有子可付以其業吾事畢矣竟  
不出而死嗚呼可謂誠篤知義命君子也  
予觀古今人傳論人行事往往務撫奇以  
動世或賤貨殖而貴枯槁之士好申一隅  
之行而忽中正之道若人能事本業以致



富又能推之以助君上而給朋友終其身  
行孝弟忠信無外慕之心則所謂富而攸  
好德是非皇極之所予哉予懼璧豐之行  
或爲好奇之士所不取故備言之無亦使  
其歿而無聞焉

月湄先生傳

先生陸姓諱求可字咸一號密菴淮山陽  
人登順治乙未科進士官福建提學僉事  
陞布政司叅議旣以文化閩士子稱月湄  
先生其居家學者亦稱之故傳月湄先生  
云先生予姻也少壯同學先予成進士十  
五年性孝友力文章行義擅風雅所以忠  
君愛國者尤以濂雒關閩之學爲講習與



臣言忠與子言孝皆是物也居身莊謹風  
旨溫克終日晏坐無跛倚教學者觀喜怒  
哀樂未發時氣象隨處體認天理皆原本  
程朱不自矯揉臆說少孤童父三錫公早  
世陸氏幾中落事祖父母母姜與二弟隕  
涕奮發年甫十齡仲季幼稚稟祖命督課  
祖病衣不解帶故祖彌留也指先生語祖  
母此藐孤行將遠到汝老猶及見年十九

補弟子員食餼能言邑中養馬事與縣令  
爭令卒從之未幾售兩闈筮仕知南陽府  
裕州吏治其講學所基也每言裕如新起  
病人裕守如無米巧婦申六諭辨軍需尊  
學校修裕誌皆繇講學而出奏績行取爲  
刑曹尙書郎大學士杜公一見嘆爲奇才  
有忙時莫忙閒時莫閒語傳爲格言督學  
八閩蒞任六載念閩爲延平考亭過化地



日召弟子肄學衡文稟經酌雅其最著者在閩士大夫口碑則執法之詳也鑒裁之精也敷教之寬也請託之絕也取天理合之與朱子近思錄延平學規相體認先生之學於是大暢矣當守祿有盜殺人南陽界中無主名閱行笈知爲孝廉田某曰吾故人也爲經紀其喪督學時舅氏姜以守備久亡閩中樞不可得訪求於古寺遂反首丘太夫人悅焉凡此皆行義卓然者若調恤翁山人周文學諸事不勝縷指其於文章風雅有密菴文集詩集詞集已鐫行世晚構精舍於城西水湄彈琴詠歌有沂水之志故號月湄竟以此終年六十有三劉謙吉曰予與陸公講學論宋左丞相厓山之忠公泣然知其先世鹽城所出及修家譜兢兢以不得世系爲憾故存而祧之



公之篤慎如此稽其二世三世祖皆有隱  
德好施繕城堞分教建昭恤院仁人有後  
何減忠貞乎公之媿不盡書附此以見月  
湄講學所自來豈偶然哉

同學姻弟劉謙吉拜傳

山陽陸氏族譜卷之五

山陽陸氏族譜卷之六

序

樸菴公輓詩序

潘 塤 河南巡撫

古者輓歌所以哀死近世乃有爲生而作  
者詩之變也然果出於好德之私則亡可  
存賤可貴疏可戚感人心而勵風俗不至  
於以薄爲道不然則如秦失之於友莊周



之於其妻禮果不爲我輩設哉予親樸菴  
陸翁今年夏七十有九考終命鄉人相與  
厚善及與其子上舍允行交遊者莫不哭  
之以詩庠友蔣子允正將錄之以付行殯  
者歌以斥苦予聞之旣以難吾鄉之風之  
厚又以羨翁之德之孚也翁承先世素業  
蚤夜作勤積居逐時發貯鬻財其贏得瘡  
於熾嗇不十年家累數千金與古之田農

山

馬醫灑削胃脯販脂鬻醬擅天下高貲者  
埒矣翁出自艱辛老益謹畏雖荷恩榮之  
賜非大慶不冠服居常未見其離疏釋躋  
固太史公所謂善富者也世有父祖遺之  
子孫廢之甚者身自創之身自失之者多  
矣何也奢與縱之故也而曰天誣矣夫奢  
則不孫儉則固與其不孫也寧固若翁者  
其孔子傷時而許之者耶予見世俗喜紛







是傳之成匪特徵其義亦以徵其報也匪  
特徵其報亦以徵其常也夫義爲人心之  
所同具特患夫人之弗爲爾未有爲之而  
不膺其報者是乃理之常也易曰視履考  
祥其旋元吉天人感應信不誣矣昔人有  
解人之難紓人之急偶合於義如遺金投  
杼之類尙蒙其福矧翁之義曰濟饑曰活  
人曰義阡曰散粟曰助婚曰施棺曰代贖  
曰構橋甃井曰平塗繕宇曰買禽放生其  
所爲者爲事不同同歸於義也翁之所獲  
又當何如耶今翁年逾七紀尙履康強其  
子若孫均能富詩書足文采閑於太學有  
日矣行將以克勲封以錫爾類而食有福  
於家足以爲鄉邦之丕式謂非無徵於翁  
之義固不可謂非無徵於其報於其常亦  
豈可哉余與陸生幸有師生之雅聞翁之



行誼而好德之心自有弗能已者故叙其  
事以彰之云

天下之論至學校而始定蓋以講明禮義  
之所賢人君子於焉假息以養其正大公  
平之義故其識見不羣而議論無頗也夫  
是以褒之斯為榮刺之斯為辱一經品列  
則身之論定焉往予之為山陽也辱與兩  
庠之士相朝夕見其儀度秩而文也言辭

鄉飲賓冲菴公輓詩序

黃日敬

戶部主事  
原山陽令



確而明也交游羣而類也未嘗不羨畿服之多材而鄉人之定論可徵矣維時冲菴陸翁以齒德位鄉席之三賓揖讓升堂步趨于于然予旣以異之然翁產腴邑中大徭役必首及翁予竊計翁老矣又孫俱上舍生必來祈免而翁竟不來祈免顧欣然承之已而兩京諸貴人書寄來稱翁之賢予又竊計殆爲他日地爾乃後大徭役及翁又不來祈免始喟然而嘆曰賢如陸翁其必爲士論之所予乎淮士予人之善而不誣者舍翁其安之今年夏初予領地曹之命卽官南都往哭翁於其堂見堂上懸輓歌辭纍纍然而予獨諦觀諸庠士詩且曰此聞見之真切而辭美之無溢也盍識諸於是翁子允登投杖而拜因請予叙之嗚呼夫言非無華之患而唯覈實之難翁



持家以儉勉人以勤勵俗以禮讓接賓友  
以孝義勗子孫以贏餘周族黨諸庠士所  
稱道如此以予爲邑長於斯也亦未暇身  
觀察之而乃信其有必然者特以不祈免  
大徭役使貧民無箕歛苦則餘可類推矣  
今歌辭中如射陽吳子餘菴顧子尤淮士  
之粹然者與予相知也深皆爲詩以悼其  
亡可謂羣而不黨者歟併及之

鄉飲賓冲菴公輓詩序

潘 塤 河南巡撫

冲菴陸翁之姪曰道者子婿也女未行而  
婿未絕翁也愛其兄以及其姪愛其姪以  
及於予其富而好禮者哉是故其生也予  
親之其壽也祝之其卒也弔之哭之詩以  
輓之無往而不致其情也翁之子舍田  
重予之誼乃重其詩以爲親重謁予序之



予於是深有感焉蓋思女則不忍忘其壻  
念壻則不忍忘其家而况翁之好禮而篤  
誼者哉翁起家勤儉兄弟各彙數千金獨  
念仲兄宗顯友而愛其性樸而顛爲之合  
資宣力服勤家政無毫髮異不幸兄與道  
相繼卒撫愛諸孤彌篤終身無間言死之  
日猶拳拳以堂構爲恨此尤人情之所難  
者或曰翁善家之道則然矣抑知其所以  
善富者乎予曰善家本也善富末也翁早  
則資舟水則資車用計然之策積居與時  
逐不責於人修陶朱之業人棄我取人取  
我與運白圭之謀爲麴蘖家則如宛孔之  
雍容爲母鹽氏則如諸田之頰卬然皆循  
守事業積彙贏利漸有所起登享萬金何  
嘗敢越法僭奢比跡於曲叔稽發雍樂成  
之徒歟翁旣富矣又文之以禮行之以義



教子姪捐金助國齒列衣冠彬彬乎比儒  
者家然則翁之善富乃所以爲善家之道  
歟翁有德慧術智若旦夕猶存吾當見其  
廣愛於家而博施於衆也惜哉翁諱瑄字  
宗遠別號冲菴享七十一壽嘗被薦拜飲  
爲三賓云

鄉飲賓冲菴公輓詩序

金 滋 進士

夫玄運靡常有生終於遷化達人不朽太  
上稱乎立德故箕疇以考終爲福曾參欲  
得正而斃是蓋與世俱存不隨景逝者也  
又有七哀七嘆覽逝水而興辭黃鳥白楊  
撫崗原而掩淚被之樂府傳於楚騷故亦  
緣情有作傷懷而慟者矣冲菴陸翁樸而



有文富而好禮鬱作鄉彥爰爲國賓有子  
若孫瑩然玉立或專幹蠱之譽或振朝陽  
之翼家道融矣還歸太虛於是鄉里君子  
文林大夫以親誼聯屬者辭以情見以風  
流感激者哀以發義小謠大詠篇章積焉  
乃以示余且請以叙披而觀之則哀而不  
傷似風悲而不迫似雅懷賢表德有頌存  
焉匪是詩曷知是翁匪是翁曷稱是詩子  
美哉交贊之矣嗚呼楚人辭賦章句成於  
太師四詩編簡叙述屬之子夏遂不辭謝  
聊爲題之云爾



鄉飲賓冲菴公元配何孺人輓詩序

夏邦謨 戶部侍郎

余為南曹戶侍時太學山陽陸生從余游  
器度舉止卓爾大雅今年春余轉官北上  
艤舟淮汭陸生衰經持狀詣余言曰田不  
幸先人去年卽世甫克襄事今重以母氏  
之戚天乎於我何哉維是鄉人士君子罔  
予棄咸賜之篇什尙賴大人先生一言以



弃其端余曰嗚呼女德之不傳於世也尙  
矣孟德曜握醇自珍擇賢以從真順之行  
困而益彰殷盛之族驕倨華侈鮮克由禮  
惟魯公父文伯之母貴不忘勞秉義敷訓  
余每讀列女傳至是未嘗不嘆曰無受天  
損易無受人益難以今觀於何孺人其殆  
庶幾乎孺人世爲山陽望族少有至性備  
閑內則歸冲菴時方十八矣冲菴商遊四  
方而孺人居娣姒間承事翁姑咸得其懽  
心旣而貲產日豐甲於鄉族乃深惟俗之  
靡麗非所以貽訓於是授子書計俾習於  
勤儉暇則督婦女縫製浣濯曰此女事之  
正也姻黨咸化之無侈習云冲菴寢疾病  
烹藥調膳必躬親之不假手於人比其卒  
也號泣頓絕復蘇飲食不時進而噎疾作  
矣臨終囑其子曰吾與汝父結髮從事共



享壽豫今又同歸夫復何恨但願汝輩無  
廢先人以禮讓有聞於世吾志畢矣嗚呼  
孺人之事上也而順行焉翼子也而教立  
焉從夫也而敬且哀得焉舉是數端餘可  
類見矣昔韓昌黎銘扶風郡君之墓曰有  
事賓祭酒食祇飭協於尊章慰我侍側及  
嗣內事亦莫有施齊其躬心小大順之不  
溢其辭而陰幽坤從之德備昭今諸挽歌  
辭叙德以宣悲耀幽以昭勸一諷詠之而  
懿行淑儀宛乎可掬異時實紀於郡乘銘  
成於太史與前所稱者相輝映於無窮也  
茲其始基之矣又奚疑



其故基之矣又矣

鄉飲賓冲菴公元配何孺人輓詩序

夫古之輓公與曰公也今之輓古與曰古

李本翰林院侍讀

也公則古而私則今也國子生陸允登母

孺人何氏卒鄉人士大夫與允登遊者惜

其賢而哀慟之各系以詩今阡葬有期太

學生王吉甫輩篤葭莩之誼切秉爨之良

代主人帙為卷子舟楫過淮適逢其請乃







其心爲難感無樂天之誠而其性爲易驕  
初母氏之適冲菴夫子也當少艾之年歸  
富貴之家約而中禮者能幾何哉方且于  
于雅雅幽閑自如以順以正克諧以和以  
是徵其有關雎之德也布衣冲淡紡績惟  
勤躬自浣濯畧無盛氣以是徵有葛覃之  
風也御臧獲以恩如煦日和風而飲食起  
居每令遂其所欲以是徵其有樛木之惠  
也肅肅雍雍上安下樂以孝以敬宜其家  
人以徵其有<sup>是</sup>桃夭之善也家室和平不妒  
不忌率彼同儕躬桑以蠶以是徵其有采  
芣之樂也端已刑家仁愛融液子孫宗族  
濟濟嚮方以是徵其有麟趾之祥也有事  
烝嘗粢盛必潔以信以誠洋洋如在以是  
徵其有采蘋采蘋之敬也畧其公之殊原  
其理之一陸氏二南可以義起矣謂陸氏



之二南真可上追於古而古之二南實乃  
先得於陸氏非陸氏不足以起諸君子之  
言非諸君子又安足以成陸氏之二南也  
哉是故交相贊者也實也而非誣也公也  
而非私也執此以往達之天下可也傳之  
後世可也僭序於篇以俟觀民風者采焉

鄉飲賓冲菴公元配何孺人輓詩序

李元山西布政司

哀輓之作肇於古侈於今夫肇於古者不  
得已也秉彝好德之良心也好之至發於  
聲所以哀有德也今有若人焉其德真可  
以追望古人之芳躅而一時之賢士大夫  
見之真哀之正與之公不爲習俗之所移  
真與古人好德之良心若合符節是可取



也已吾淮陸孺人何氏者以壽終於正寢  
吾淮士大夫咸有詩章以哀之真知其母  
之賢也而兩京士大夫因其子太學生田  
之賢而推其有得於內教者聞母訃而亦  
哀之詩章充棟田乃編懸諸堂將寶藏之  
以垂範子孫將以今年十二月吉扶母柩  
權厝七里塘之新阡乃衰經泣拜予門以  
禮幣請予文爲輓詩之冠予會諸親戚并  
耆儒每道其母之賢及子田之孝予聞之  
熟矣序又何讓按狀孺人姓何氏父諱璵  
大河官舍母史氏亦望族生孺人聰敏勤  
儉十八歸鄉賓冲菴勤儉之德相合夫婦  
相敬如賓冲菴治貨市屢經營不息閭內  
之事孺人任之孝事舅姑如事父母承事  
伯叔謙和妯娌訓教子孫督率僮僕雍雍  
肅肅也孺人雖居積殷厚天性勤儉躬親



中饋畧不假借冲菴寢疾孺人率子孫躬侍湯藥朝夕不怠及病不起號哭不輟聲者累日緣是得疾踰年而逝享年七十二嗚呼痛哉生子田太學生治家有父風且精於文事兩京及吾鄉士大夫咸重之配梁氏女一適太學生謝良材孫男三德律徑律太學生孫女四適太學生張科次生員丘案二尙幼曾孫二嘉慶嘉兆其狀之大槩如此予乃嘆曰賢哉陸孺人也乃與冲菴合德並美先後相繼而逝同登古稀之壽之上而得賢子田之賢榮登太學將有顯仕他日推恩封及父母光榮萬倍照耀九泉矣又况孫枝蕃衍書香相繼榮貴疊臻而陸氏高門沐慶無已水源木本皆由於冲菴與孺人之積德也予於是尤以徵諸士大夫之輓直追古人而無歉也是



為序士大夫之躋直出古人而無嫌出景

由外中發與歸人之贊謝出子效景出以

登疑而對天高門水慶無日水感木本肯

繼式泉矣又史新林蕃治善香酥餅榮貴

沐照廿廿日錄恩桂又父母式榮萬齡照

公壽之止而再復于田之習榮登太學繼

中恭合斷並美式舒味錄而後同登古絲

大樂吹此千八與日寶特對歸人出八與

與哀太學璧豐公輓詩序

莆田高超南京戶部郎中

淮陽太學生陸君璧豐既卒踰年其子律

銜哀述遺行以告諸縉紳士大夫間拜而

徵辭曰庶其使吾父有聞乎於是士大夫

哀其志者往往作為歌詩以讚播而追輓

之凌雲鴻筆爛然凡若干首四溟子亦覽

而哀之然恨不能詩也憶昔嘗讀韓文公



太學生何蕃傳蓋盛稱蕃之仁勇且哀蕃  
居下其可以施於人者不流也及今見友  
人吾溪謝君所爲作陸璧豐傳亦稱璧豐  
在太學好捐貲賙人急事二親克盡孝道  
乃晦迹以終斯其人品行概與蕃豈異耶  
抑文公爲蕃作傳時蕃尙在故其輓詩不  
復見於世若璧豐旣沒而傳作士大夫相  
與哀歌之一歌之衆和之哀成卷帙俾觀  
者感焉不必過其閭里經其祠墓輒歛歔  
太息而不能禁懸觀將來其較蕃蓋益炳  
融矣太史公嘗謂閭巷之人欲砥行立名  
者非附青雲之士則不能施於後世夫不  
得施於人而施於後世若陸璧豐者其亦  
何哀耶



太學壁豐公元配梁孺人哀歌序

屈希尹

漣水教諭

余讀詩二南每慨然嘆曰天下未易化者  
莫女婦若也而周之江漢之女汝墳之婦  
咸有貞信之行肅雝之德焉近時女教既  
廢室家中以賢淑見稱者鮮矣余家食時  
每聞江海客盛談淮之上舍陸璧豐先生  
貲產甲淮郡厚積博施崇禮尚義名動縉



紳惜未識其人也隆慶戊辰下第後謁選  
銓司獲典淮郡漣邑教漣士梁生楷每請  
業於余間嘗談及若姑母梁氏孺人之賢  
歷歷可爲閩內式徐而索之乃知爲璧豐  
先生之內子而璧豐先孺人卒且十餘年  
矣嗚呼閩閩之賢夫亦江漢汝墳之化也  
孺人生於名家作嬪君子其幽閑之德則  
關雎所咏也締綌之工則葛覃所稱也敬  
共豆籩孝篤姑嫜則采蘋所遺也克相夫  
子誕育令嗣則芣苢螽斯所頌也青燈苦  
節幾二十年則共姜栢舟所誓也嗚呼賢  
哉其亦有見聞於二南所歌者乎生三子  
曰德曰律曰徑舉後先登太學有時名而  
德律又不祿孺人所賴終養者季子曰沂  
水君而已越歲春沂水以次入選授鴻臚  
序班乃迎母就養金陵不幸母以隆慶改



元秋九月八日卒於金陵之寓舍享壽六十有六梁生聞孺人之訃匍匐以往茲將迎柩告竈於陸之先隴拜乞余爲哀歌以遺之俾秉鐸者歌之以慰孺人之靈云歌曰繫淮山之秀孕今產茲窈窕之好迷撫芳年而結悅今得璧豐爲佳儔淑慎厥躬兮惟內範之克修日奉姑嫜兮實敬共乎髓饒翊夫君南遊太學今蜚妙譽於皇州樹厥家於芳茂兮無忝徵義之遺謀天佑淑懿兮誕三鳳以延休咸嗣美而登庸兮與英俊而並遊方連翩而失其二兮增孺人之隱憂賴沂水之獨奮兮益努力於前修列鴻臚之清華兮近榮光於宸旒乃迎母而致養兮祝遐齡於千秋更孫枝之衍芳兮展振世之洪猷母胡不待兮駕翠輶而乘剛颺奄一去而莫追兮度滄溟之弱



流與姑射以徜徉兮駕長虹而登瓊樓  
於雲四塞兮天地爲愁埋玉高岡兮庶得正  
於首丘慟顯幽之永隔兮惟芳聲之世留  
魂白下以來歸兮指松楸而優游

允芳公建昭恤院序

潘以墳河南巡撫

無所爲而爲之者義也有所爲則利矣義  
利之間君子小人判焉夫人之所謂義者  
輸粟以裕國也解麥舟以助喪也還帶還  
金以周急而焚券以濟乏也飾寺觀建浮  
圖以奉佛修橋梁道路以便民也皆所謂  
義也吾不知其心何如也今夫裕國者承



君之令叨官爵之榮其助喪周急而濟之也未必非內交要譽也其曰奉佛曰便民凡以種福田云爾是皆以利爲利而豈以義爲利者哉予故甥陸允中弟允芳年少而見理明爲善篤審於義利之間不惑於流俗之見凡世之所趨以爲義者一切不爲人或諷之則曰吾祖宗以無心之感通神明以無妄之福遺子孫而某何敢它求哉予嘗過其家談淮陰古今人物至韓侯信則曰英雄不幸爾人能察之人能表章之至楊尙書靖則曰猶夫信也有居能全其軀無人能繼其絕某里人也惟公教我予曰昔晉宋諸名賢無後者或因墳立寺或舍宅爲寺今尙書墓田膾膾在里之東可屋而守也允芳聞之卽慨然揮金以爲已任度地誅茅率作興事堂廡翼翼門垣



井井立主肇祀戒僧世守雖鄉大夫士聞  
而佐費撫鎮郡縣樂而施予不及什之三  
五焉工成予題其額曰昭恤院而紀其事  
於石郡守白山張公亦作碑以成不朽嗚  
呼興滅繼絕一舉而仁義並行矣昔吳廣  
陵太守趙昱爲笮融所害門戶滅絕張紘  
遣人設祭求親戚爲之後徐原與陸瑁素  
昧平生聞其篤義臨死遺詩託以孤瑁爲

之起墳收導其子天下聞而高之然一則  
爲其察孝廉一則爲其有聞有託且有子  
也若允芳者後尙書百六十年杳乎其不  
相及旣無所後以知我又無所識以得我  
而况非福田之可種耶吁是誠無所爲而  
爲之者也無所爲而爲之異乎人之所謂  
義矣不賢而能若是乎予故表而出之以  
風我邦人



誥授奉政大夫密菴公壽序

林起龍

總督漕運  
宮保尚書

士君子匡居絃誦唐宋而上周秦而下凡  
賢相名臣循良隱逸與夫文人詩客皆得  
而友之又時出其已之所智見論議得惟  
其意所去取且生而懸弧又當有四方之  
志則攬轡所經其奇才俊彥足備異日公  
卿之選者皆得而知之而羅致之廣厲而



長育之其惟督學乎然非從白虎青藜後  
畢經生業而以表帥人士修古文禮樂之  
事亦或難焉楚州密菴陸公繇進士起家  
南陽州守中土諸郡悉殘餘也公時拊其  
民而噢咻之以高等入補刑部郎諸郡邑  
若監司所上爰書自大辟及城旦春與滯  
獄疑案卽不能盡有所平反亦必傳以生  
議就常調出校閩中閩雖褊瘠人文素甲  
於天下丁戊來瘡痍日甚征於不粒賦於  
無衣而所謂子衿者皆齒少氣銳不規形  
勢讀書而以賢才自許者也旣多貧拓落  
不能事生產復不能如嚮時以其才名衣  
食於富家巨室近卽邑令亦每得以法繩  
之氣奪矣志或餒焉公至導之以規溫之  
以語第其文而微進退之遂有以大服乎  
其心爭自洗濯磨淬期有以當乎公憐惜



一陽氏方言  
裁成之意夏五月四日公初度也諸紳敬  
而慕之豫走不佞所屬一言爲壽夫禮五  
十日艾始服官政而公尙未及期則已提  
督學矣詩曰在泮飲酒永錫難老以言魯  
侯加意泮宮國之人稱願如此也魯爲侯  
國猶樂乎從公于邁况公爲

天子宣教四方使衆著於孝弟之義者乎而其  
美作人也又曰周王壽考益人才蔚起若

棧樸然芄芄然盛也而薪之槩之尙足以  
備數世之用是其敦龐淳固之氣燦爲雲  
漢追琢之章人文丕變而振作不倦也壽  
考者期之之辭也不佞奉

簡書總督淮揚淮揚間莫不嘖嘖公賢公名先  
以文起不佞卜公壽兼以其文文以氣貴  
公之文浩瀚磅礴若洪流下注行乎其  
所不得不行氣盛故也然雕龍繡虎森森欲



動而不能以嘯風喻雨且一篇之中山經  
水誌物變人亂雜出見奇則麤縵而寡要  
公之文靜好閒適若疎鐘清漏不棘不舒  
又若凌雲之臺輕重權衡一一相得無他  
神全而精足也夫精神氣養生家以爲延  
年久視之要此乃公之所以爲壽者也書  
曰考造德不降我則鳴鳥不聞則以公耆  
德之所造將見賢才盛而家國昌或鳴於  
岐或儀於庭休瑞嘉徵莫不備至

朝廷以虛台衡以待公豈獨私吾閩哉其在閩  
也亦如景星慶雲得先覩之爲快耳夫誦  
讀尙友古之人持衡長育天下士壽考作  
人惟公有焉故推詩書之意而致祝於公  
如此若夫惠政在裕盡心刑曹固皆足以  
收積德之報然非不佞所宜多贅也

康熙癸卯歲仲夏壽日



...



...

...

...

...

...

...

誥授奉政大夫密菴公壽序

蕭震  
兩浙巡鹽御史

天子曩余備員西臺與

密菴先生交至驩也旋奉

簡書視鹺吳中所至皆言淮陰陸大夫賢右

其鄉人尋而有督學全閩之命余固加額

朝廷用稱其官因私幸鄉人士之得辱大造

長育於先生方無窮也雖然先生之所以



大造長育天下豈徒自今始哉先生起家  
名進士刺史裕州州人德之比於趙廣漢  
尹翁歸等而亦晉學全閩之命余因賦  
當守嘉五馬之勞晉其秩郎比部比部天下  
刑所麗郎多所平反他曹無如秋郎能也  
天子方茂菁莪之化南顧閩服耑簡先生先生  
之蒞閩也崇正學抑奔競騫者以絕端風  
俗頒格言表者以詘一時士有負未白者  
先生不遺餘力生全之士氣稍稍伸品題  
藻別冰鑑澄清以故所識拔無非知名士  
者

今上冲質諸大臣勵精圖理思以文治治早晚  
下璽書召臯夔於外入佐揆席豈異人任  
然則余向之所私爲其鄉幸者今且將爲  
天下幸哉值中天令節爲先生攬揆辰吾  
友孝廉諸君函書都下丐余言爲壽夫余



言何足以壽先生先生文章經濟海內艷  
傳皇猷行藉黼黻爲鐘簴綿無疆之休先  
生當強仕之年以壽身者壽天下方未有  
艾何所俟余言惟諸孝廉先生甄陶感先  
生併幪有若坐春風而飲醇醪不能已其  
稱觴介眉之慙慙也余何敢辭固陋因授  
簡以侑菖陽之觴

誥授奉政大夫密菴公壽序

蕭

震

兩浙巡鹽  
御史

今天子勵精圖治稽覈繁廣研及圭撮而世之  
論豐功偉績者僉謂戡亂以武致治必以  
文欲移風易俗戶比封而天下慄慄焉冀  
得一嚴恭欽明正直公忠之臣出仔肩世  
道使宇內文運學識一歸於醇正庶幾後  
學之士修業向方儀矩有鵠然後薪槱著



於澤宮雲漢章於聖世此其故若管敬仲  
之論禾也始其少也眴眴乎何其孺子也  
其壯也莊莊乎何其士也其成也油油乎  
何其君子也天下得之則安不得則危故  
明詔渙汗謂非密公不足以當是任公自奉  
簡書入閩卽整剔學政八閩人士如披春風如  
晞冬日如薰蒸於閩闔沆瀣之中潛受其  
益而不知甫下車祇遵

功令首試三山嗣考漳郡所拔皆知名寒士  
文武兩場或論文或論人或論射或論事  
瑕而瑕瑜而瑜葭者瑤者瑤魚目不以  
溷韎鞞砥硃不以廁璆琳不且爾也語云  
公能使跛牂爲駮駟乎公能使萑葦爲菁  
莪乎吾于公見之蓋公之德業洪深而度  
量越人遠也譬如觀江海者警濤駭浪吞  
天浴日之險而江海不以爲奇雖至於晴



空煦日萬頃如鏡涉之者無風波之患魚  
龍舟楫出沒其間而江海自若然後知江  
海之爲量宏而爲德大也此可以論公矣  
嗣後部檄抵省暫停試事閒暇間擁書坐  
嘯必以名教自任金谿鵞湖濂洛關閩之  
學娓娓爲天口爲聖鐸欲以挽回世教人  
心以故化行宇下自俊髦暨吐隸無不滌  
腸煎慮飭躬厲行姝姝暖暖翕然相率鼓

吹休明謂非公嚴慈欽明正直公忠之素  
有以格心向化曷能臻此今昭陽單闕之  
歲端陽之四日爲公覽揆初度之辰諸同  
儕寮友丐余一言爲祝然則余何以祝公  
午月爲臯其節天中公之勲名岌嶻天中  
兆矣且公家世山陽代出偉人如鉢池建  
陵諸山形勝甲天下間氣所鍾英賢挺生  
祝公之年也亦如岡如陵更按天官所書



文昌六星在北斗魁前之六府其占與三公同公自乙未奮跡南宮守裕州舉卓異行取歷刑曹兩任出督閩學所至著聲今主上冲聖方虛端揆之席待公入而論道公年未及艾黑頭三公于公見之矣况時方盛夏良苗懷風所謂煦煦莊莊油油者公不但陰膏八閩之禾而且霖雨六合之黍爲楨爲幹福我邦家三復申甫之什穆如清風矣因鞞鞞而敬爲之序 峕  
康熙癸卯歲臯月壽日



誥授奉政大夫密菴公壽序

黃志遠

翰林院侍讀學士

淮陽陸公咸翁之來督閩學也

簡書初下閩士聞者皆喜相賀也曰是以文名天下者士能文無不得當公矣及公蒞止士旅見於學宮進講詩義公正其非者而與其是者躬為討論旁通曲當而諄諄以文行為多士勗士益悅服為得所依歸公



既進士而試之士私相謂某能文宜最某  
夙有名負奇宜爲公所前列皆應曰然已  
而果然士含三寸之管經營於寸晷之中  
其遇合先後之數若不易知而能必之於  
公者蓋公之文教理宗於程朱諸儒文澤  
於遷固韓歐而體格必取於成弘諸先正  
要於重實學明體適用而已故士之有才  
學者若操符而取之譬之造車不出門而  
知其合轍其尺度一也是以公之試閩初  
及閩中清漳耳而六郡之名士皆以不得  
早遇公而如閩中清漳也閩負山戶海風  
氣質樸非能諛其師長者公奉

天子命糾督閩士法臬清嚴非曲阿其士者而  
士顧慕公弗置不佞閩人側從士大夫後  
問公何以得此於閩士僉謂

國家三載較士於學糊名而進至公也衡文



之任必擇有才望者至明也公絕薦剡嚴  
干謁而甲乙去取必親持衡以伯樂而相  
馬寧有留良乎公以生明明而益公公明  
之任惟公允稱職是之由且閩自唐相常  
袞以文誨後進宋諸儒倡濂洛之學號海  
濱鄒魯五百年矣今雖鼎革而圖志所云  
家庠序而人詩書朴而守禮謹而畏法者  
未有改也自造士者未知其道自踈其士  
輒操法以繩之而士亦有躍於法者公至  
誠表廸爲教不怒而士咸驂服罔敢縱逸  
以君子長者之道待士而士亦將有以自  
待也則公之與私異也宜多士之鼓之舞  
之也茲夏五爲公初度閩士樂作人之德  
而願公之壽考也則走不佞所乞言爲公  
壽顧不佞何言哉不佞聞古之稱壽者皆  
耄期今公方彊仕德業聞望其未有艾不



佞雖於公有相知之雅亦何遽爲閩士致  
大年祝哉無已則以公之壽在閩者先爲  
公介昔宋文習五季之陋自歐陽子出始  
歸於古眉山遠在西蜀自子瞻爲公所取  
士而蘇氏之文一日名動京師今士文不  
實務爲拾取公以通經學古爲教而閩風  
丕變閩僻海隅異日有以文章甲天下者  
公之功有以先之也然則公之於閩起衰  
之文壽在千古樹人之澤壽在百年則不  
佞今日爲公致祝無大於此矣雖公將以  
壽閩者壽天下而不佞在閩先言閩也公  
世掇巍科以名進士起家爲裕州守著績  
循良爲秋曹郎平反明允學無不宜所在  
有聲今因閩士之請故不別及惟言公所  
以督閩學者

康熙癸卯歲仲夏壽日



以正其學

昔者今因國士之請始不

前又為拜曹眼平又即

舟時歲時以各執士賦

壽國者壽天下而不

封今日為公姓

之文壽本千古

士授奉政大夫密菴公壽序

林起龍 總督漕運  
宮保尚書

文運之興也則必有人焉學窺天人之蘊

為世儒宗者主持其間而一代之文運以

興士風之正也則必有人焉望負山斗之

隆為士師表者倡率其上而一代之士風

以正如吾閩

督學咸一陸公誠其人者公以淮南名宿成



進士出知裕州治行爲天下第一晉秩西  
曹多所平反有于張杜李之譽尋膺

特簡視學八閩其文體必以先正大家爲宗一  
時英才網羅殆盡如伯樂過冀北而馬羣  
爲之空者暇則進諸生於庭論文講業所  
行條教輒以身先又復繪幾希之圖著身  
世格言及功名道德諸歌刊布學宮以爲  
士類勸戒雖法之所在一笑一頓不少假

借其在園橋觀聽執經問字之時諄諄啓  
發藹然可親不殊父兄之於子弟也自  
功令嚴諸生抗糧之例有司喜吾法可行而  
吏胥因上下其手以逋欠之目坐之子矜  
公深知其弊禁諸生之攬役而懲吏胥之  
舞文學校歡騰如釋重負邇頰壁雖存廟  
貌非昔公慨然捐俸修葺丹雘樸斲煥乎  
可觀其行部所經輒興建考亭諸儒祠廟



倡明理學搜購遺書凡所思移風易俗以  
裨益乎世道人心者其爲善政不可勝書  
昔胡瑗設教蘇湖推究聖賢治已治人之  
道以爲教本有司言湖學科條甚具請取  
法著令爲太學程而召瑗爲國子師陳選  
督學南畿本四書五經及小學西銘性理  
諸書以爲教法訓生徒一主於躬行三典  
文衡爲一代督學使者之冠今我公再掌

賓興報政伊邇

御屏置名必當大用從此入侍

經筵坐論弘化以其效之一國者推之天下  
興八閩之文運而天下之文運因以大興  
正八閩之士風而天下之士風因以大正  
蓋不啻如陳選之屢命督學而胡瑗之召  
師國子也則今茲多士所爲躋堂稱觥祝  
天壽之平格者固將以我公公之天下不



必八閩歎受其福矣

康熙丙午歲蒲月壽日

大密菴公督學復命序

鄭 磊

閩大宗師陸公以績滿當還朝磊業與同舍

生林榛為詩欲上之矣則林生謂磊曰吾

與若弱冠慕為詩歌古文即不能工而皆

被宗師賞識今宗師實有大功於閩校一

旦為萬里之行且膺不次有日矣吾二子

其可不重之以文而僅詩乎哉磊聞之色



恐曰吾實不如若之文卽文何敢跪而進  
諸長者生日事師之道無隱行言就正有  
懷而不畢宣是謂內欺罪也磊愈恐爰單  
精拜手援筆累日而成文其辭曰八閩實  
海濱鄒魯云先是諸大儒數起於文學蓋  
彬彬矣明末士於文不競其於微言大義  
蔑如也明用此失國入

大清來宗師蒞閩六七輩鮮不以功令文體  
爲兢兢顧八閩阻負山海寇災日見告士  
貧多以負租致鞭扑文行近亦少衰矣陸  
公至則首念士之卽於鞭笞以爲黷序羞  
爰請於督撫二臺於是乎有馮笞之禁士  
聞於書義卽不知爲文所由

廟謁之日凡進講多預備講章升堂循誦而  
已公是以有質書之命而士由此始瞿然  
知書書義旣明而文體弗申文將有近理



而越體者公是以有文體之諭督學之約  
八閩多儒先舊里兵燹之後祠墓圯壞而  
儒書散亡公每閱歷輒瞻拜徬徨是以有  
祠墓之修遺書之購孔孟千載之傳續於  
周子而稍岐於龍谿不一辨析表章學無  
宗的公是以有玩周子太極之詩讀王龍  
谿語錄之辨舜與跖之分無他利善間之  
不知毫釐千里矣公是以有舜跖分路之

圖夫人勤則思而善心生逸則忘善而惡  
心生三年一試士其怠矣公是以有按月  
之課課而不梓則士無所觀奮雖課猶怠  
也公是以有課牘前後之刻而士咸爭自  
奮受公陶冶以有成若此者煌煌乎鉅典  
繁者蠲之墜者舉之衰者正之出者入之  
危者輔之倦者翼之敦之以詩書說之以  
仁義和之以愷悌董之以嚴威動之以至



誠趣之以中正寬而不柔威而不猛惠而不費功而不德文而不靡近易而不流公於學政誠所謂金聲玉振集大成而無遺憾矣寧僅一狂簡小子之受裁云爾哉公今行矣離宮墻而升鉉鼎將於是乎在子小子雅望公之以大造閩者大造天下也其可不重之以文而僅詩乎哉遂退而與林榛私序之如此

林榛

大宗師密翁陸夫子以督學績成當之京復

命榛與同學鄭磊約俱爲文送行以少叙其

六載受深知之情無何磊文先成榛讀之

曰磊言夫子之學績則備矣榛將何言哉

無已則以古言古之宦於閩而能興學以造閩士者莫如常袞袞之於閩士也始造之矣閩士之於袞也首功之矣史言閩地



肥衍有山川禽鳥之樂士之能文章者不肯仕進自袞爲觀察使擇能文之士與爲主賓釣禮游觀宴集必偕故閩士矜慕向學歲貢士與中州等是袞之能因時勸學以有功於閩士如此若夫子之則大難於命袞而有功於閩士亦大倍於袞閩自隸職大方以來山海之孽數數竊發屢煩禁旅而大兵之後凶歉頻年近雖漸次削平而傷凋未起士無事親養志之資且賦稅之逋於士有特嚴徭役之興於是鮮優復又國家欲嚴辨真才以裨世用而鄉會之試寧限其額以示慎重士之能文章者艱於仕進是與袞之時大不侔矣夫子以爲欲閩士之向於學而知所樂必先去其所苦於是於賦稅則別其所逋之由而曲爲區畫立之條約于徭役則分其優免之等上之



督撫毋使吏胥保甲得作奸其間且體  
朝廷慎重用才之心掄士必矢公正士之能  
文者無不自見冰壺之操水鏡之譽士咸  
悅服故不以功名爲艱而以有才自奮至  
若擇所首列士進之函丈數與論文兼以  
游燕閩人慕而向學絃誦視前有加猶之  
袞也故閩自唐後人才之盛雖久與吳越  
雁行乃夫子進所遴士於癸卯丙午兩闈  
而登賢書者多出異等士舉南宮者又多  
於他省是夫子所遇難於袞而績亦大於  
袞閩之人至今尙頌袞功則夫子之功其  
歌頌於閩宜也雖然袞文人耳其所以誨  
閩士者僅以文耳夫子以江南文學之宗  
立儒先表率之範言行規矩以身爲教而  
所誨人者皆本於湖州白鹿之法榛讀教  
條及訓士諸詩未嘗不欣歡鼓舞以爲當



吾世而有大儒俾

榛

得所依歸然則以興

閩爲士言袞功固不若夫子之大若其體  
用兼全之學文行並敦之教袞又烏能及  
夫子之萬一哉閩人之俎豆袞者以其始  
造之勤而於夫子則食其大成之德矣今  
夫子行矣夫子之德業方將大施於天下  
而教思之在閩者則與閩山閩水而俱永  
矣榛受知於夫子視八閩之士爲最深而  
晨夕受教於夫子視八閩之士又最親茲  
因送行故抒夙誠而爲是言然是言也非  
榛之私言實八閩之士之公言也於是以  
質於鄭磊磊曰子之善以古言也宜書以  
送夫子之行且就正於夫子



皇清定鼎削平西南大兵往來如織符檄所需  
 皆咄嗟辦前守往往以不辦治去密菴守  
 裕軍需旁午皆儲侍待取辦俄頃而民間  
 若弗聞也者民歌之士懷之賢聲聞於

而其諾授奉政大夫密菴公六十壽序  
 往余典尚書比部時陸密菴適以裕州奏  
 最入為曹郎余稔知裕州之難治也寇躡  
 數四田荒人流當

皇清定鼎削平西南大兵往來如織符檄所需  
 皆咄嗟辦前守往往以不辦治去密菴守  
 裕軍需旁午皆儲侍待取辦俄頃而民間  
 若弗聞也者民歌之士懷之賢聲聞於



輦下遂以最遷異哉密菴何以得此於裕也余揣密菴必八面才及晤對時凝然儒者也氣息深深言若不出口閒與之商天下事疊疊鑿鑿若燭照數計手摹而足畫者試以煩劇如不經意雖甚盤錯處之若無事余蹙然爲起敬且慶國之有人也世多言儒者徒爲容止褒衣博帶無適於用而見事風生名爲能吏儒者又譏其虛恢儒而才緩急可爲國家倚賴世豈復有如密菴者乎比部事棘甚經密菴綜畫罔不帖妥他曹有不及皆取決於密菴他人或不克竟其曹事密菴常治兼數曹猶有餘裕余倚之如左右手世常言古今人不相及如密菴者在古人中當居何等耶古固有耳聽算數口答書問手揮而足蹈五官並用者矣亦或有身兼數器入粗入精罔



不見奇者以目密菴皆不足道也夫至人之應世能癡形而用心亦能冥心而易形或以耳視而目聽亦或眉語而神行此非有他謬巧得道故也密菴其幾是乎余嘗爲密菴言吾黨經世當令閒時不閒忙時不忙則事罔不濟密菴嘆息以爲名言顧其復余曰要令忙時不忙先須閒時莫閒意密菴爲陶士行一流閒察密菴閒居則

又未嘗不閒也顧獨見其手執一卷靜若經生下帷時而已然則密菴之所謂閒忙加於余一等矣可不謂知道者哉昔項襄毅識劉忠宣於司屬指其座曰此座不久屬公矣余於密菴亦云頃之以文望督學八閩閩爲才藪識詞林李子光地於髫年預卜爲公輔之器拔詞林唐子朝彝林子仲達陳子夢雷於小試而元魁取若司契



八閩人謂密菴文章識鑒爲從來持衡者  
第一抑不知密菴前此理煩治劇之能也  
前大吏推轂密菴以能治劇不知其文章  
經國之業又卓卓如是也顧豈第如是而  
已密菴有不試試無不效有不爲爲必絕  
倫孔敬康有公才而無公望丁世康有公  
望而無公才至於密菴可謂兼之矣

聖天子方側席求賢以紆南顧之憂自惟以人  
事君庶幾可幸無罪非密菴將誰屬邪密  
菴方需次里居聞其著書課子而外無一  
事令子三人皆成國器其撰述淵富淹貫  
天人余日敦其成書授梓爲經世先資會  
其初度六十乙未榜同年之仕於朝者謂  
余知密菴深願得余一言爲密菴壽余腐  
心憂國又焉能文惟是端居深念思得一  
士匡余不逮以上報



國恩萬分之一惟密菴一人而密菴疇昔  
比部時上下議論往來余心未嘗一日忘  
之然則舍此又何言也諸君子其爲我謂  
密菴曰安石不出當如蒼生何密菴其可  
久耽泉石乎且太傅優游東山亦政六十  
喬松導引與臯夔事業孰多孰少此固密  
菴疇昔之雅志也密菴其脂車秣馬余日  
幾幾望之矣

康熙歲次丙辰夏日吉旦

保和殿大學士太子太傅兼禮部尙書甲辰癸  
丑會試總裁纂修

實錄總裁前戶刑兩部尙書年家侍生杜立德  
頓首拜謨



記

造饗堂增塋地記

裔孫求可

予一世祖父母二世祖父母塋在昭恤院  
 南菊花溝雙磚錐三世祖父母四世祖父  
 母塋在關家橋俱無饗堂五世祖父母六  
 世祖父母高祖父母曾祖父母祖父母塋  
 在七里塘河南亦無饗堂草房數間久已



傾倒予心戚戚乙巳歲巡建寧於察院閱  
卷之暇偶思及此遂畫饗堂一圖戊申春  
正歸里卽命匠役建造禮記云君子將營  
宮室宗廟爲先廡庫爲次居室爲後予未  
知禮然未嘗不兢兢焉至於瞻墳之地舊  
雖有之而未能成方也予措金以購頗覺  
整齊刻圖於後後來者當尊祖敬宗世世  
守之

家廟記

裔孫志謹

我陸自鹽城徙山陽至今已十三世矣自  
始遷祖爲別子之宗櫛風沐雨披草萊荆  
棘以至我子孫孰非祖宗爲芘賴哉然仕  
於朝者自先大夫學憲公始禮大夫三廟  
一昭一穆與太祖之廟而三士一廟庶人  
祭於寢等而上日路寢等而下日適室日



適寢何以統曰家廟所以別士庶人也大  
夫廟祀始爵者然則祀當自先大夫始自  
先大夫始此謹等之志非先大夫志何以  
言之先大夫素有家廟之志以先大夫祀  
三世則當自謹等之曾祖祖父始猶十三  
世之五世卽先大夫之三世也嗚呼所謂  
三廟者各一壇一墀合一廟而祀我子孫  
何幸而得祀高曾祖爲不祧之廟也回思  
櫛風沐雨披草萊荆棘之祖不免祭於寢  
祭於適寢皆不得稱廟也我先大夫所以  
汲汲有家廟之志也先是康熙乙丑二月  
謹買本宅東余姓屋以正廳三楹中祀曾  
祖曾祖妣神主昭祀祖父祖妣神主穆祀  
先大夫神主爲三廟昕夕禮焉歲時伏臘  
禮焉吉凶生忌時薦禮焉禮大夫士宗廟  
之祭有田則祭無田則薦家廟者祭與薦



皆可也維我子孫式增式廓勿替勿怠家  
道之隆在此非此而流於師巫左道謂之  
淫祀鬼神吐之我子孫慎之哉詩稱肅雝  
和鳴先祖是聽此先大夫學憲公之志也  
謹敬述之爲家廟記時康熙二十五年丙  
寅桂月朔日

祖置輪差義田記

既修家譜竣有以義田之說問者志謹曰

祖父之念此至審矣其議始於高祖新川  
公而式廓於吾父密菴公益祇有祭田耳  
然謂之義田請得而暢其說乎義田者是  
古之圭田而宋范文正公衍之以賜宗族  
之匱乏者也宗族之賢者有爵於朝則思  
起而增繕之祖宗豈不以賢且爵望子孫



乎是義田乃祭田之餽餘賢子孫當仰而  
思所以變通綢繆者如吾家之最劇莫里  
遞追呼分派以世占民籍不得不先爲合  
族慮吾新川祖則慮之矣新川公寘石塘  
河南田八塊計田八十畝零七分又寘石  
塘河北田五塊計田一十四畝一分七厘  
二共計田九十四畝八分七釐議每年租  
銀十兩以貼走遞年爲逃亡之費其本甲

里遞差事自曾祖叙寰公叔曾祖楚白公  
創立義舉雖見有五大房當遞差徭止老  
四老五兩房至明季時六叔祖如之公吾  
父密菴公又慮之矣議凡遇遞年四年之  
中老大房老二房老三房合當一年老四  
房自當二年老五房自當一年歷來照此  
而行今康熙二十年起因時異勢殊合族  
公同再議議定每四年承認老二房老五



房合當二年老大房貼老五房老三房貼  
二房老四房仍自當二年志謹志寬志默  
三人當一年志仁志遠志超合當一年所  
有祖塋田上租銀輪流隨走遞年之人取  
討除正租十兩之外加租銀一兩以爲走  
遞年之費原貼工食銀四兩今減去一兩  
止貼三兩每年照派定各房公出庶衆擎  
易舉是爲里遞慮至愍也其於祭田何吾

父又慮之矣吾父自成進士至爲學憲歸  
里又續置祭田一頃八十一畝六分七厘  
在於石塘河南祖塋左右爲春秋奉祀家  
廟合族分賑慮至愍也或問於義田尙需  
增補乎 志謹 曰義田以均里遞祭田以頒

賑肉不爲不厚矣爲人子孫不思所以圖  
長久而耽耽於賙濟匱乏是爲賢且智歟  
楚茨之詩曰我黍與與我稷翼翼以饗以



祀以妥以侑為祖宗祭田詠也大田之詩  
 曰彼有不穫穉此有不斂穧為宗族之無  
 告者詠也以烝髦士以介景福為賢子弟  
 詠也其可不思所以增繕之歟則斯田也  
 謂之祭田而圭田並變通乎義田不益宏  
 遠歟若夫再為宗族匱乏計再寘義田義  
 倉義學以備慶弔肄業之費則志謹有繼  
 吾父之志焉容補於譜中先為之記

南田一塊南三十八丈

東三十四丈

北五十三丈

西二十三丈七尺

計田二十一畝九分

北田一塊南五十三丈

東三十七丈

北五十丈

西四十二丈

計田三十三畝九分

西田一塊南二十二丈

東二十三丈

北二十二丈

西二十八丈



計田九畝三分五厘

乙山辛正西田一塊

南二十八丈五尺 東五丈五尺

北二十八丈 西九丈

計田三畝四分

又田一塊南三十一丈 東十丈

北三十丈 西十丈

計田五畝一分

又直南田一塊

南六丈 東二十一丈

北三丈 西二十二丈

計田一畝六分

河邊田一塊南十二丈 東十三丈

北二十丈 西十三丈

又田一塊南十丈 東十一丈

北十一丈 西十二丈



計田二畝

以上共田八塊計田八十七

石塘河南祖

塋左右

石塘  
田一塊

南四丈五尺

北十八丈

北四丈五尺

西十八丈

計田一畝三分五厘

田一塊

南二十一丈五尺

東十七丈

北二十一丈五尺

西十七丈

計田五畝九分五厘

田一塊

南十二丈

東二丈五尺

北十二丈

西二丈五尺

共田五分

田一塊

南九丈

東七丈五尺



北十三丈

西七丈五尺

計田一畝三分七厘

田一塊

南七丈五尺

東三十五丈

北九丈五尺

西三十五丈

計田五畝

以上共田五塊計田十四畝一分七厘坐落河北

祖塋左右

二共計田九十四畝八分七厘



